

MULEGNS: spustada dalla Tgesa Alva

Visitaders an en cuntign



Uscheia sa preschentava la strètga agls Mulegns ier ...



... ed uscheia sa preschainta ella oz.

G.N.S. Igl èn ossa gio set deis tgi la Villa Alva agls Mulegns è eida sen viadi e neida spustada per radond otg meters. Igl interess medial per chella spustada è sto fitg grond. Anc pi grondas èn ossa las marveglias scu tgi la strètga tras vischnanca sa preschainta siva la spustada.

Igl 1856, cura tgi igl pastizier Jean Jegher è turno da Bordeaux agls Mulegns ò el laschea construeir per el sulet en bietg imposant anmez vischnanca e chegl tenor igls plans dad egn digls pi renumos architects dalla Frantscha. Per la Vialla Alva ò el fatg grondas investiziuns e per la construcziun da chella duvro angal igl migler material. Intern ed extern ò igl object uscheia tutgia tar egn digls pi bels an Surses. 164 onns è la Villa Alva stada anmez igls Mulegns e siva dall'emda passada ò ella retschet en oter post e chegl en plaz situo anc pi fitg vers sid.

Pi spert sen viadi


La spustada sezza è eida tot tenor plan. Kurt Brüllhart, igl magnagestiun dalla firma Itten SA è sa musso ventirevel siva digl spitachel da radond 75 minutas. La spustada seia eida ensatge pi spert tgi previa. Calculo ins veva en taimp pi lung. An ena minuta è igl bietg ia 60 centimeters sen viadi. Per spustar en object dovrigl igl sies taimp e digl reminent seia en spustamaint er betg ena cursa. Igl venderde siva tg'ins ò spusto la Villa Alva è bagn l'egn u l'oter automobilist sa dumando

tge tgi seia mai capito cugl edifezi anmez igls Mulegns. Gio igl venderde on bleras persungas gia interess da neir agl Mulegns per vaseir quant gliunsch tg'ins vegia propi spusto la Villa Alva. Sonda e dumengia ins ò vasia agls Mulegns en pivelung tg'ò gia marveglias noua tgi igl bietg sa catta ossa.

Er pigl cantun en mument spezial

Roger Stäubli, igl inschignier digl Uffezi da construcziun bassa ò detg tgi seia bagn en evenimaint plaschevel cun neir spustada ossa la «Villa Alva». Ansomma seia igl antier project fitg singular. Chegl tgi pertotga la tecnica ins savess er far diever da chel sistem da spustamaint tar otras strètgas noua tgi igl

traffic passa tras igl li. A Beiva per exampl gess chegl betg, perchegl tgi ins vess betg igl li per plazzar igl object. Digl reminent avant 25 onns era previa er a Cunter da spustar ena tgesa, alla fegn finala è tuttegna nia decida da far en passape sutteran. Per menziunar, las lavours preparativas e la spustada sezza tgi costa dus milliuns francs surpeglia igl cantun. Giuan Jegher tg'ò 82 onns è tratg se ainten la «Villa Alva». Per schlarger la strètga digls Mulegns ins vegia gia blers projects, tots tgi vegian alloura fatg naufragi cun betg catar en'unitad tranter autoritdas e possessours digl bietg. Ossa seia el pero fitg cuntaint tgi la sia tgesa paterna resta e tg'ins vegia betg la sbuada.



Cuntaints tgi tot è ia or bagn. Igls represchentants digl Uffezi cantunal da construcziun bassa cugl intendand d'Origen. (da san.) Roger Stäubli, Reto Knuchel, Giovanni Netzer e Markus Dünner.